



UNIVERSITÄTS-
BIBLIOTHEK
PADERBORN

Universitätsbibliothek Paderborn

Praxis Et Brevis Declaratio Viæ Spiritvalis

Palma, Luis de la

Antverpiae, 1637

Exhortatio ad Exercitia facienda.

[urn:nbn:de:hbz:466:1-50934](https://nbn-resolving.org/urn:nbn:de:hbz:466:1-50934)

*Exhortatio pro EXERCITI-
ORVM commenda-
tione.*

Spiritu ambulate. ad Gal. 5.

LOCVS hic, in quo versamur,
exercitium requirit. Et sicut cor-
pora, quæ nec ambulant, nec aliud exer-
citium faciunt, infirma sunt, plurimos-
que gignunt malos humores; ita spiri-
tus qui se non exercet, infirmus sit
necesse est: atque ideò Apostolus, tam-
quam præclarus Medicus, dicit, Spi-
ritu ambulate.

Experientiâ constat, corpora nostra
pluribus infirmitatibus esse obnoxia:
eadem nos docet, spiritum suis morbis
non carere, propter varias quibus sub-
iacet mutationes. Exemplum sit. De-
serto quis sæculo Religioni se consecrat;

B 4

paucis

paucis ille post diebus, in Nouitiatu ita se mutatum miratur, vt se non nouerit; ad eum in oratione feruorem peruenit, tam ad omnem mortificationem animatum se, ita contemnentem honoris, & de sui contemptu letum, paupertatisque amantem se animaduertit, vt numquam se in villo honore rerumque abundantia & mundi libertate, simili gaudio perfusum fuisse meminere, vt sibi videatur cum omni gratiarum actione dicere posse: Qui sanat omnes infirmitates meas. Translatus postmodum ex amœno Nouitiatus viridario ad studia, aliaque SOCIETATIS ministeria & exteriores occupationes, paulatim se (causam ignorans) persentiscit tepidum in oratione, effusum in sensibus, in honore viuum, suarum commoditatum ambientem, in recreationes corporisque

com-

*commoda fœdè propensum, querulum,
 ambitiosum, functionum & officio-
 rum honorificorum cupidum, se sua-
 que ex politicâ & humanâ lege &
 terrenâ sapientiâ gubernantem, qui-
 que omnem suam quietem sitam habet
 in Superioris erga se beneuolentiâ; &
 cui solus ille arridet Superior, qui non
 imperat, sed rogat; & vt roget, prius
 eum consulit, & petit, Quid tibi vis
 faciam? Certum est, quòd spiritus
 ille infirmus sit, quia cum inquietudi-
 ne & dolore viuit, seque ad Exercitia
 motumque spiritualement, & ad omnes
 honestas occupationes valdè indispo-
 situm sentit. Causa huius infirmitatis
 clara est; quia ita seculum deseruit,
 vt inordinatos suos affectus nondum
 mortificarit: qui, quia viui sunt,
 pascuntur reculis quibusdam seculi,
 quæ in Religione etiam sunt, & sine
 B S qui-*

quibus vita hæc non vivitur. Quod
benè Cassian. Collat. 4. Abbatis Da-
nielis cap. 21. Iam illud ridiculum
qualiter exprimetur, quod non-
nullos post illum primæ renuntia-
tionis ardorem, quo vel res fami-
liares, vel opes plurimas ac mili-
tiam sæculi relinquentes, semet-
ipfos ad Monasteria contulerunt,
tanto cernimus studio in his quæ
penitus abscindi non possunt, &
quæ nequeunt in hoc ordine non
haberi (quamuis parua viliaque
sint) esse deuinctos, vt horum cu-
ra pristinarum omnium faculta-
tum superet passionem? Quibus
profectò non magni proderit, ma-
iores opes ac substantias contem-
pisse; quia affectus earum, ob
quos illæ contemnendæ sunt, in
res paruas atque exiguas transtu-
lerunt.

lerunt. *Et postquam hanc materiam
 fusè profecutus est, concludit sic:
 Quid enim differt, vtrum quis
 perturbationem cupiditatis erga
 opes amplas atque magnificas, an
 erga viliores exerceat species? nisi
 quòd in eo reprehensibilior iudi-
 candus est, quòd qui maxima
 spreuerit, minimis obligetur? Id-
 eoque perfectionem cordis abren-
 nuntiatio ista non obtinet, quia
 cum censum habeat pauperis, non
 abiicit diuitis voluntatem. Hanc
 autem voluntatem sequuntur distra-
 ctiones, curæ, timores, prætensiones,
 concupiscentiæ, & reliquæ, quæ huius
 mundi bona comitantur, spina. Et qui
 vestes amat Naaman, leprâ inficiatur
 necesse est; & corpore inter Religiosos
 præsens, spiritu se extra illos inueniat:
 quia in Religione quærit quod in mun-
 do*

do seculares, & quod Regula, professione Religiosa, Christi Domini nostri doctrina, eiusque exemplis contrarium est.

Hinc sequitur, duo esse Religiosorum genera. Aliqui enim corpore tantum tales sunt, qui veste & externâ rerum omnium obseruantia, qua sunt quasi exercitia corporalia Religionis, contenti sunt: alij verò etiam spiritu, qui de oratione, de passionum mortificatione & in virtutibus profectu tractant, qua sunt velut anima & spiritualia Religionis Exercitia. De quo pulchrè sanctus Bonaventura de reformatione spiritus, quòd nempe duplicis generis inueniantur Nouitij, istis verbis: Ideò quamdiu Religiosus nondum cupit intelligere & sapere ea quæ sunt Spiritus Dei, sed in exterioribus obseruantis adhuc

huc putat totum constare quod ad veram Religionem pertinet, Nouitius est, si etiam pluribus annis in habitu Religionis steterit. Et hos perpende duos esse Nouitiatus in Religione: vnus ad probationem, qui terminatur quando promittit obedientiam & stabilitatem in Ordine per verba; alter durat quousque Religiosus statum benè viuendi ita in consuetudinem conuertit, quòd iam non solum verbis, sed etiam factis promittat, se stabilem in fide, Ordine & profitendi studio permanfurum. *Si autem duplex sit Nouitiatus, sicut benè Sanctus ille notat, sequitur quòd duplex etiam debeat esse vocatio; vna ad habitum, altera ad profectum spiritualem, quando aliquem pudet solum habitum Religio-*
nis

nis gestare, Religionis verò spiritu destitutum esse; atque ideò de verà passionum suarum mortificatione, & studio in veris virtutibus proficiendi agit. Et ista secunda vocatio idem est atque ad Exercitium spirituale vocatum esse, & ad viam spiritus sequendam: quia, vt Apostolus ait, non possunt superari desideria carnis, si in spiritus viâ non ambulatur. Spiritu ambulate, & desideria carnis non perficietis.

Sanctus Pater noster in Annotatione primâ, declarans quid sint Exercitia spiritualia, dicit: Sicut deambulare, iter facere, & currere, exercitia sunt corporalia; ita quoque præparare & disponere animam ad tollendas affectiones omnes malè ordinatas, & iis sublatis, ad quærendam & inueniendam
volun-

voluntatem Dei circa vitæ suæ institutionem, & salutem animæ, Exercitia vocantur spiritualia. *Via illa quâ ambulandum, eundum & currendum est, à nobis incipit, atque in Deo finitur, hoc est à noxiis nostris affectibus procedit ad voluntatem divinam; atque hoc est abire à se, vt propior fias Deo, & desertis cupiditatibus inordinatis, Dei expleas voluntatem, ne sis de numero Religiosorum tepidorum, de quibus Cassianus, qui solo mundum corpore deserunt: quare inordinata spiritus desideria, vt salutem animæ spiritualem assequaris, cōprimes.*

Hanc viam spiritualem S. Pater noster in suo Exercitiorum Libello in quatuor Hebdomadas distribuit; quæ sunt quasi quatuor profectioes, quarum omnes passus sunt hi.

Primus est, odium & dolor peccatorum,

torum, quod est auelli à malâ vitâ. Non sine ratione dicitur auulsio: quia itinerum difficillimum est, de domo suâ exire, eamque deserere. Et hoc in primâ Septimanâ queritur.

Secundus passus est, mortificatio passionum, proprio amori, sensuali & mundano bellum indicendo, ad imitationem Christi Domini nostri: quod initio secundæ Septimanæ in Meditatione Regis temporalis nobis proponitur.

Tertius est, Exercitium virtutum, secundum doctrinam sancti Euangelij, præcipuè paupertatis, contemptus honoris, & humilitatis cordis: quod prætenditur in Exercitio de duobus vexillis.

Quartus, non tantum amare paupertatem & humilitatem, sed esse dispositum ad re ipsâ deserendas diuitias

tem-

temporales; & ad omnem egestatem
& humiliationem, prout intelligemus
id ad Dei gloriam & obsequium fore,
paratum se exhibere, cum firmo pro-
posito nihil quarendi, quod non sit ad
obsequium Dei Domini nostri: ita ut
solo desiderio Deo Domino nostro me-
lius seruiendi, ad quidquam ample-
ctendum vel reijciendum moueamur,
ut dicitur in Exercitio de tribus ho-
minum classibus.

Quintus, quòd, etiam si laus Dei
par foret, tamen, ad maiorem Christi
imitationem, eligam potiùs cum eo
paupere, spreto & illuso, pauperiem,
contemptum & insipientiae titulum,
quàm opes, honores aut sapientiae æsti-
mationem amplecti, prout dicitur in
tertio gradu Humilitatis. Hi verò om-
nes passus ad secundam Septimanam
pertinent. Ut autem ad hunc perfe-
ctionis

C

Etionis

Etionis gradum in viâ spirituali tam pretiosum perueniamus, & in eo nos magis magisque confirmemus & roboremus, duo maximè iuuabunt. Primò, si nos in Meditatione de Passione Christi Domini nostri exerceamus; in quâ perfectissima Heroicarum virtutum exempla videre licet, cum summâ contradictione ac pugnâ exercitarum à Christo Domino virtutum: qui, ut faceret voluntatem Patris, omnibus se difficultatibus, quasuis à se mundi delicias reijciendo, generosè opposuit. De hoc agitur in tertiâ Septimanâ.

Secundò, multùm iuuabit, solatio spirituali haud leuiter delectari, quod est Beatorum gaudia prægustare: hoc enim omnem omnino rerum creatarum gustum saporemque tollit, sensusque torpere facit, ut in difficultatibus & aduer-

aduersis non moueantur; sed fortiter in charitate, à quâ perfectè oriuntur virtutes, se exerceant. Hoc est totum illud spirituale iter, præcipuiq; in eo passus, quibus nobis progrediendum singulis Septimanis, singulisque Meditationibus, laborando, vt in nobis propositum illud, quod in ijs prætenditur, excite- tur; vt benè notat S. Pater noster in undecimâ Annotatione inter viginti primas, cuius post faciemus mentionem.

Aduertendum, quòd in primâ Annotatione S. Pater noster benè annota- rit tres gradus Exercitij spiritualis, ad similitudinem corporalis, qui sunt, am- bulare, proficisci, & currere. Ille am- bulat, qui intra spatium limitatum va- dit & venit, nec vlteriùs progreditur: & ij sunt qui quotidie orationem fa- ciunt, conscientiam examinant, librum spiritualem legunt, Sacramenta fre-
 C 2 quen-

quentant; & tamen iisdem semper manent irretiti passionibus, nec se post multum temporis plus profecisse vident quàm primo die. Ratio est; quia vadunt & veniunt, & bonis suis desideris & propositis ita à se exeunt, vt, cùm laborandum est, ad se redeant. Plus à nobis exigit Apostolus, cùm dicit, Spiritu ambulate: quia longam ille commendat viam; vt nempe à se recedentes, Deo appropinquent, suamque voluntatem deserant, vt diuina perfectè obediant. Porrò non tantùm monet vt in illâ viâ ambulemus, sed curramus, vt alibi dicit: Sic currite, vt comprehendatis. Et ille currit, qui toto impetu suæ voluntatis Dei voluntatem scire desiderat, vt illam, proprio suo sensu pedibus substrato, perfectè compleat. Vide Basilium in Regulis breuioribus Interrogat. 259.

Quis

Quis est feruens spiritu? qui cum ardenti studio, & inexplicabili cupiditate, & assiduâ diligentia voluntatem Dei facit in charitate Christi I E S U Domini nostri, conuenienter illi quod scriptum est: In mandatis eius volet nimis. *Et ille est gradus perfectionis, quò Exercitia diriguntur.*

Hinc patet, quòd licet multi sint qui ad orationis perfectionem anhelant, eiq; per hæc nostra Exercitia insistent, pauci tamen eam perfecte adipiscantur: quia hîc ego tres gradus triaque genera hominum inuenio. Aliqui dicunt, se hanc orationem obtinere per Exercitia; quia versantur circa eamdem materiam eademque puncta, eadem diuisione & ordine seruato qui Libello Exercitiorum comprehenditur: quod illo in genere tam exiguum est, vt si vltius non

colliment, dici non possint, orationem per Exercitia obtinuisse. Alij sunt, qui ad sublimiorem gradum nituntur; quia non tantum de eadem materiâ meditantur, verum etiam in meditando & se examinandi modo eas leges, conditiones & instructiones, quas Liber hic Exercitiorum præscribit, accuratè servant. Alij ulterius progrediuntur; quia, præterquam quòd prædicta servant, animæ suæ insuper eadem proposita & conclusiones imprimere student, idque eo ordine iisdemque mediis, quæ S. Pater noster docet Libello isto. Et hi sunt qui finem à S. Patre nostro propositum plenè consequuntur: atque hæc est causa, ob quam dixit, integra illa Exercitia non posse dari nisi paucis, iisque valdè capacibus personis, qui summo perfectionis desiderio tenerentur. Non ratione materia;
quia

quia omnes vtiliter se in Meditationibus de vitâ, morte & Passione Christi Domini exercere possunt : nec ratione formæ seu modi orandi circa tres potentias ; quod fiebat in primâ Septimanâ. Quæ ergo causa erit, quod sanctus Pater noster in Parte 4. Constit. c. 8. litterâ C. & in 7. c. 4. litterâ F. dicens, quòd Exercitia primæ Hebdomadæ generaliter multis dari possint, addat Exercitia secundæ Septimanæ, & integra non debere nec posse dari nisi paucis personis, & iis à quibus magnus ad Dei gloriam fructus sperari possit ? Clarum est, quòd hoc dicat propter ea proposita & dictamina quæ in secundâ Septimanâ exiguntur in electione faciendâ, ut quisque se in suo statu reformet : & propter illos charitatis tam sublimes & perfectos gradus qui in quartâ Septimanâ re-

quiruntur, & magnam supponunt ingenij capacitatem, bonam dispositionem, firmamque se in iis cum fructu exercendi voluntatem.

Ex quo sequitur, quòd ille solus perfectè Exercitia hæc faciet, qui modum orandi seruans, qui in Libello proponitur, circa materiam & puncta quæ ibi proponuntur, bona illa desideria & conclusiones eodem comprehensa in se excitare conabitur. Tandem, quomodo-cumque nos Religiosi SOCIETATIS Exercitia faciamus, cum non tantum pro spirituali nostro profectu, sed & vt ea aliis tradere possimus, & Magistri in hac arte euadamus; clarum est, quòd nobis sufficere non debeat, quòd ea intelligamus, & frigide nos in iis exerceamus, sed hoc faciendum cum summâ perfectione. Quomodo enim eorum rationem reddemus, si ea perfectè
non

non intelligamus? Et quomodo per
viam nobis ignotam quemquam du-
cere poterimus? quomodo tandem ar-
mis vtemur, quorum vsum non habe-
mus? Ideò dicit sanctus Pater noster
in Parte 4. Constitut. cap. 8. §. 5. Ad
Exercitia spiritualia aliis tradenda,
postquam quisque in se ea fuerit
expertus, assuescant, & dent ope-
ram omnes, vt & eorum reddere
rationem, & in hoc armorum spi-
ritualium genere tractando (quod
Dei gratiâ ad ipsius obsequium
tantopere conferre cernitur) dexte-
ritatem habere possint.

Tandem, monendos vos iudicavi,
quòd tempore illo, quo soli, & ab omni
aliâ occupatione liberi Exercitia hæc
facietis, non expediat legere in hoc Tra-
ctatu aliud quàm instructionem Et
Meditationem istius diei; studendo
C 5 fru-

fructum, qui per illam intenditur, colligere, non transeundo ad alia quæ aliis diebus consideranda & agenda sunt, iuxta id quod benè Annotat. II. habet S. Pater noster: Quòd exercenti se in primâ Hebdomadâ expedit nescire, quid in secundâ sit acturus; sed ad consequendum illud quod tunc quærit acriter laborare, perinde ac si nihil boni postea esset reperturus.

